



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tir_yimyim

tir yimyim TAPAK 7

Mitchell Starc IPL nung tanungba asayatem nung masayatsü

Taoba South Korea tir Yoon-i party toktsüogo

VOL. XXII ISSUE NO. 213 (ADOK 213) DIMAPUR AMUNGNÜ (SUNDAY) MONUPII (MAY) 18, 2025 ₹ 5.00

CANSSEA Dimapur Unit lokti senden amen

Dimapur, May 17, 2025 (TYO): May 17, 2025 nü Saramati Hotel Dimapur nung Confederation of All Nagaland State Service Employees Association (CANSSEA) Dimapur Unit lokti senden menogo.

Sentong nung CANSSEA Dimapur Unit president I. Anungba Sanglir-i okila jembidang sorkar aser nübor tajungba nung tenzüksü atema shisadangtsü ayongzük.

"Sorkar mapa inyakertemi mapang shia khuretem ajurur saka nungdaka ta asüba nung dang ola adoktsüla. Tanü asenoki kechi lemteta ayur ibaji asenok atema dang masü saka tarutsü nung asenok melenzükba ketdangsürtem aser staff tem atemaa lir" ta Anungba-isa ashi.

Iba senden nung 8th ROP,

CMHIS, Old Pension Scheme-i meyiptsüba onüktem benoka lemsatep aser tatem nung tesentepertemi CANSSEA central team ajanga lemtetba pusema nungittsü bangiemtep.

CANSSEA Dimapur Unit-isa All India State Government Employees Federation (AISGEF) pusemba sayua July 9, 2025 nü strike nung shilem agitsü telemtetba agiogo.

Iba senden nung Taxes, Excise, Geology & Mining, Food and Civil Supplies, NST, Land Survey and Records aser District administration nungi nübotem shimteta Fund raising Committee ka tentettsü telemtetba agi.

Senden nung CANSSEA Dimapur Unit General Secretary Lolano Patton-i anküp tepela o jembi.

BJP Nagaland-i Dimapur nung Tiranga Rally ayonga agi



Dimapur, May 17, 2025 (TYO): Nagaland nung tanü Tiranga Rally ka ayongzuka agiogo aser iba ya Operation Sindoor takok ngua inyakba ateam tenüngsang agütsüba sentong ka lir.

Indian Armed Forces aser India sorkar pusema nungitba sayua tanü iba sentong ayongzuka agi.

Iba sentong ya state president Benjamin Yephthomi lenisüba kübok BJP Nagaland-i ayongzük aser Dimapur kübok Super Market (Naga Shopping Arcade) area nungi tenzükur Walford ajanga DDSC Stadium nung oa tembang.

Kilometer ana jungnua jajaba sentong nung schools aser colleges nungi kaketshirtem, ex-servicemen dena nisung meyrjang aikati shilem agia liasü.

Iba sentong nung kaketshirtem aser public-i meter

170 talang National Flag ka bener jaja. Sentong nung adenertemisa Operation Sindoor pusemba placards amer jaja.

"Linük longjema alitsüla aser armed forces-i linük kümzüka ayutsü mapa inyakba pusema nungittsüla" ta Public Health Engineering Department (PHED) Minister Jacob Zhimomi-i tesentepertem ayongzuka jembi.

"Asenoki teti non-violence aser peaceful coexistence nung amanga arur saka linük kechaia ozüing alema inyaksangshiba aser pei sensotem amakba atema ola madoki melitettsü" ta Jacob-isa ashi.

Indian armed forces-i ali, anüing aser tzüym nung taküm bendanga agüja linük kümzüka ayuba atema tetushi agütsür. Asen tetsü tasoli kümzüka ayuba special forces nem tetushi agütsür ta paisa metetdaksü.

"Nagaland state aser asen Chief Minister Neiphiu Rio tenüing nung onoki India sorkar aser armed forces pusema nungitba metetdaksür" ta Minister Jacob-isa ashi.

DDSC Stadium nung rally tembangba sentong nung Jain Yuva, Bengali Samaj, Dimapur District Citizens' Forum, Muslim Council Dimapur, Western Students' Union, Marwari Samaj, Bihari Samaj dena civil society groups balala nungi teshimtet nübotemi armed forces pusema jembi.

Pakistan nung amenoka aliba telungpur teloktemi kiralongraba mapa inyakba aitsür ta parnokisa ashi.

Nagaland Governor, La Ganesan-ia Dimapur nung Tiranga Rally nung adentsü atema aru aser pai tesentepertem ayongzuka jembi.

Kuki kaketshir tanishir anema FIR benok

Imphal, May 17, 2025 (Agencies): Manipur Police-i Kuki Students' Organisation (KSO) Delhi president Paojakhup Guite anema FIR ka benokogo.

Ukhrul district nung 5 buba state-level Shirui Lily festival nung Meitei nunger madentsü amokmerenba atema FIR benok. Meitei nunger buffer zones adena mesüidaksütsü mesüra benjung amungdak nungi taküm meyipa meyoxtsü ta Guite-i amokmerenba video ka social media nung prokshiba sülen police-i iba mapa inyak.

"Paojakhup Guite-i Shirui festival dak sendakba nung Meitei nunger amokmerenba video sülen Churachandpur police-i FIR ka benokogo. Kidanger district tem nungi pa aputsü atema bushitepdar" ta Manipur Police-i metetdaksü.

Mizoram, Assam, Nagaland, aser Meghalaya nung police nem osang sangoktsüogo aser parnok dang aputsü atema yariteptsü mepishiogo ta Manipur Police-isa ashi.

May 20 nungi 24, 2025 tashi Ukhrul district kübok Shirui Lily festival nung adenertem kümzüka ayutsü atema nungdakba security maparen inyaksü ta Manipur Police-isa metetdaksü.

Shirui Lily naru ya Tangkhul Naga nunger teimba ser aliba Ukhrul district nung angur aser iba ya Manipur state flower lir.

"Parnoki Meitei-Tangkhul tesentaktep akangshitsü atema Shirui festival amunger, saka benjung nung adeni arur Meitei nunger tebur mesüra tetsür shinga taküm meyipa meyoxtsüla" ta Guite-i video nung shia lir.

CM Neiphiu Rio-i customary aser formal law amalitepa aotsü ayongzük

Kohima, May 17, 2025 (TYO): Chief Minister Dr. Neiphiu Rio-i customary law wazüka ayutsü aser Nagaland atema High Court balaka amenoktsü indang nenshia jembiogo.

New High Court Complex, Meriema nung High Court Bar Association (HCBA)-i süngdong atemba sentong ka ayongzuka agidak Dr. Rio aden aser pai idangji loktiliba nung nübor telemsa ajak tenzükba legal system ka alitsü ayongzük.

"Asen oboula nunger shisatsü ajanga asen lokti len anir arubaji asen formal legal system den külemi benshitettsü" ta pai ashi.

Constitution nung Arrla 371(A) kübok customary law kümzüka lir aser iba ajanga Nagaland nung ozüingren nung tongti shilem agia arudar, ta paisa shisem.

"Asenoki formal courts nung dang temulung agütsüra yimdaklirtemi aiben temeten



mangutsü aser ibaji senotsü maliba aser inyakym junga memetetba ajanga asütsü" ta Dr. Rio-i ashi.

"Asenoki okadak repringdangra asen aluyimertem aser yimdaklirtemi senotsü magütsütettsü" ta pai tebilemtsü onük ka lemsatep.

CMDr. Rio-isa Laishiba nung Mika nungi ozüing amertem dang ochishia inyaksü, yimlibilem meimtsü, aser ajemalua jajatsüba tayongzükba agütsü.

HIGH COURT ATEMA SENOTSÜ TEYARI MANGUR

Nagaland nung High Court balaka amenoktsü atema Centre nungi senotsü peria mangur. Union Ministry of Law and Justice aser Chief Justice of India dangi aiben temepishiba shiditem züluaka Centre nungi High Court yangluba nung yaritsü atema senotsü teyari kecha mangur. Ajisüaka, Assam, Manipur, Meghalaya, aser Tripura nungbo teyari ngua High Court yangluogo ta pai ashi.

"Tang tashi nung asen state rongsen nungi Rs 214 crore tema endokogo. Iba ki renemtsü aser

staff ayutsü atema Rs 300 crore talila nungdaker" ta Dr. Rio-isa ashi.

High Court balaka amenoktsü atema infrastructure enoksema lir aser iba nung courtrooms, judges' residences, aser support facilities densema lir ta pai metetdaksü.

"Iba complex mali nunga High Court balaka amenoktsü koka lir saka India sorkari High Court balaka amenoktsü mapang matong ta bilemba atema sasar" ta CM Rio-isa ashi.

Tetsükdaksüttem liaka onoki High Court balaka amenoktsü

atema maneni akhangtsü. Temeten mangu tashi inyaksü, ta paisa ashi.

Chief Minister Rio aser Advisor T N Manen nati judiciary pusema nungitba atema Gauhati High Court nung Judge Justice Kakheto Sema-i pelaba metetdaksü.

"Chief Minister Rio lenisüba kübok state sorkari tesüba küm ana tsüingda High Court building yangluba nung Rs. 150 crores tema agütsüogo. Sen aika agütsüba ajanga sorkari Nagaland nung justice delivery system akangshitsü nangzükba sayur" ta pai ashi.

"Nagaland nung High Court balaka amenokbaji ketdangsübaren tsütsü mapa tayongba akümba dang masü saka temzüng akhümket, maittsü jangjashiba aser temeten kasa angutsü atema lir. High Court balaka amenokba ajanga temeten maparen tajungba nung inyaksü" ta Justice Sema-isa ashi.

Mokokchung nung world hypertension day mungogo



Dimapur, Monupii/May 17 (TYO): Mokokchung district nung May 17 nü world hypertension day mungogo. Iba sentong ya "Measure your blood pressure accurately, control it, live longer" omen nung ajemdaker CMO conference hall aser health units ajak nung agia liasü.

Sentong nung Dr Limanaro DPO (UIP&RCH)-i blood

pressure azüoka ayutsü, iba ya kodaser adoker aser blood pressure high akümba dak lendong keta alibatem aser anema alitsü atema iba ya koda nokdangtsü iba indang tangazükba agüja liasü.

Laisa, lokti nung hypertension indang tangazükba agüja iba tashi nokdangtsü koda tongtibang iba indang nüburtem nem tangazükba agütsütsü

nükjidong nung iba anogo amunger ta ashi.

Iba dak sendakba nung ita ka tepeyong NCD screening campaign ka Mokokchung District ajunga nung May 17 nung June 16 tashi agitsü. Anungji nüburtem dang special screening drive mapang pei anasatiba health unit temi oa service tem agitsü metetdaksüogo.

Angh Ganesan-i Byatikram Educational Conclave lapoktsü

Dimapur, Monupii/May 17 (TYO): Nagaland Ang La Ganesan-i Byatikram Educational Conclave laoktsüogo. Iba sentong ya Byatikram Group aser The Times of India nati ayongzüka Latika Cinema hall complex nung Honibarnü agiogo.

Angh-i ashiba agi iba amala conclave tem ya kanga tongtibang kong tebilembatem mapa küma aoer ta ashi. Item sentongtem yagi education ya textbooks kija dak metaloker aliba dang masü saka, innovation, kati ka taoba ta züngshitepba aser telongjem ajungkettsü atema tongtibang ta

angateter. Iba amala sentongtem nung kaketshirtem, tesayurtem aser temelenshi bener arurtem longjemer aser ecosystem ka yanglur kong shisatsütem agi tetsükdaktsü aika kokteta aoer aser iba ajanga linük terenlok nung teyari agütsür.

Pai ashiba agi, tanü India ya alima nung economy tulutiba rongnung pongububa lir aser jenjang pezübuba asoshi Japan tajateter dang lir. Taruba küm tashi nungbo asenoki Japan ajateta alima nung economy tulutiba rongnung pezübuba akümtsü. Asenok arok nükjidongji India ya nüjiso ngur

2047 küm küm 100 ajungba tashi nungbo developed nation mesüra viksit Bharat kümdaktsütsü asoshi lir, ta pai ashi.

Kaketshir, professionals, innovators mesüra lenir kaka ama teyari agütsütsü atema asenok ajak dak tashi lir, ta Angh-i ashi.

Asenok ajak longjemdi aser iba arok nükjidong atongtsü atema asen tashi intokti. Longjemer asenoki 2047 küm tashi nungbo India ya tebandang maliba, yimjiyimjung aser terenlok temaitsü ka kümdaktsütettsü, ta Angh-i shisem.

Peren nung "World Hypertension Day" mungogo



Sentong tembangba sülen shilem agirtem tangokba noksa nung angur.

Dimapur, Monupii/May 17 (TYO): District Health Society, Peren-i ayongzüka May 16 nü Samzuiram yimtsüng nung "World Hypertension Day" mungogo. Iba sentong ya "Measure your Blood Pressure Accurately, Control it, Live Longer" omen nung ajemdaker agia liasü.

Sentong nung o jembiba mapang Dr. Viholi, ZLO, Peren-i, diabetes tashidak ajanga timtem adokdaktsüba aser iba

ya koda nokdangtsü iba onük dak rangloker jembiba liasü. Laisa, hypertension indang symptoms aser treatment tem indang tangazükba agüja liasü.

Maneni Dr. Viholi-i tashidak nungi pila alitsü atema teti exercise agia alitsü koda tongtibang iba indang lemsatepba den sentepa aliba lokti dang metsü aser totzü ajema achitsü ajungshia liasü. Laisa, cancer adokba aser iba tashidak koda anepalutsü iba

indanga tangazükba agütsüogo. Lai, yi ajemba aser moko achiba nungi pila alitsü ajungshiba den takok tashi süngjanglijang aser aonsotsütem acitsü ajungshi.

Sentong nung nisung 46 dak Blood Sugar, BP tendang aser parnok nem health dak sendakba nung tangazükba balala agüja liasü.

Sentong nung Dr. Viholi, ZLO, stakeholders, ASHA tem aser staff temi shilem agia liasü.

High Court obendangertemi süngtong atemba sentong ayongzüka agi

Kohima, Monupii/May 17 (TYO): The High Court Bar Association (HCBA) Kohima, Nagaland-i ayongzüka tanü Kohima nung High Court Complex tasenba nung süngtong atemba sentong ka ayongzüka agiogo.

Alakteta jaoker ama Nagaland Chief Minister Neiphiu Rio-i, obendangertem den jembiba mapang, iba ya otsüsütsü ka ta ashiba den sorkar aser institution tem nung sustainable environmental inyakyimtem benoka inyaksü kodang tongtibang iba indang lemsatep.

Rio-isa, iba inyakyim tajung atema HCBA, obendangertem, prosecutor tem aser legal fraternity züngsemtem nem tenügsang agütsü. "Iba inyakyim nung densema alirtem ajak nem ni tenügsang agütsür," ta pai ashiba den naro apongba tebur tajung süngtongtem den kanga junga bilemdanger shimba süngtongtem atemba ajanga High Court tasenba kanga tebur junga kümdaktsütsü, ta shisem.

Rio-isa, süngtong atemba ajanga alima tebur jungdaktsüba dang masü saka iba ajanga nüburtem anisüngzükdaktsür, ta ashi. "Nenok anogoshia temzüng ozüng dak sendakba nung mazüngi alir anungji iba ajanga nenok mulungsentsü süngjemdaktsütsü teyari agütsütsü," ta pai ashi.

Maneni pai tanga department aser talisa police battalions aser district enforcement forces dang iba inyakyim angazüka benshitsü ajungshi. "Parnok nübu peria lir anungji parnok indang campus tem kanga junga anepalua tebur junga kümdaktsütettsü," ta pai ashi.

Süngtong atemba ya art aser science naprongla ta shia Rio-i, mapang shitak amshia süngtong atemtsüba aser anepalutsüba aser tasatem koda tongtibang iba indang lemsatep. "Süngtong ka taküm ya süngtong atemba tsüngküm mongpu dak tulu ka keta lir. Metsüwa ya ajak dang tajungba lir," ta pai ashiba den tzüngluruwa süngtong temra takok ama bilemer saka tera junga yanga moteter ta ashi.

Councilor Kazheli-i Daklane Ward-7 nung tzübo ka semzüktsü

Kohima, Monupii/May 17 (TYO): State yimtiba nung tzü agi kanga anüngba mapang Kohima Municipal Council (KMC) Councilor Kazheli Tungoe-i Honibarnü Daklane Ward-7 nung nüburtemi kanga nüngdaka aliba community ring well ka semzüktsüogo.

Community ring well ya KMC kübok ward nung iba amala project tem rongnung mezüngbuba lir aser iba ya 15th Finance Commission (FC) Tied Fund kübok Councilor Kazheli-i achaayanga inyakogo. Iba tzübo ya kiyong nung lenirtem, kiyongertem aser GB tem

China nunger shin o "süngtong atemtsüba mapang tajungtibaji küm 20 tejakdang liasü aser tanabubaji tanü lir," ta asüba benoka jembiba mapang Chief Minister-i tanü jenjang agiba ajanga tarutsü putu ajangzüktsü aliba indang lemsatep. Tzü mopung tamajungba küma aoba indang tekümdangtsü metetdaksüba mapang pai, "süngtong ajak tsüngtokba den ango ajak sama aoba sülen asenoki sen mechitettsü ta angatettsü," ta pai ashi.

Maneni Rio-i Naga nunger tekonglu ayimba inyakyim tenügsanga jembi aser ashiba agi, nüburtemi ali koda kümdang amshitsü aser tzümopung koda wazüka ayutsü iba indang jangja lir. Paisa, sentong nung shilem agirtem dang süngtong atemtsüba dang masü saka anepalu asütsü ajungshi.

Tatem nung Rio-i, "asenok ajaki süngtongtem ya anepaludi, ajita asünung dang item süngtongtem ya High Court tasenba nung tebur junga aintsü," ta ashi.

Sentong nung okila jembiba mapang HCBA tir C T Jamir-i, iba sentong nung tejaokertem aser obendangertemi atemtsü atema association-i state aser kidanger Assam nungi ornamental tree saplings aser naro 1000 shi bener aru ta ashi.

Gauhati High Court obendager Justice Kakheto Sema-i ashiba agi, süngtong atemba ya mapa tila ka ama bilemtsü akok saka tetezü tulu lir. Süngtong atemba ajanga asenoki asen atema mebilemi tarutsü atema bilemba sayur.

"Küm noklang ka sülen asenok shinga malitsü akok, saka asenoki tanü tema toktsüba süngtong aser asenoki yangera toktsüba institutions maneni alitsü. Item yagi asen nükla, khuret aser tejangraba indang jembitsü," ta pai ashi.

Advisor for Law & Justice T N Manen-ia sentong nung o tatsüka jembi, kong Cabinet minister G Kaito Aye aser Advisor tema densema liasü. Sentong ya HCBA secretary Joshua Sheqi lenisüba nung agi aser A Zho-i sarasademer tenzüka liasü.

matsüngdang semzükja liasü.

Iba tzübo ya kiyong kübok Sector-2 nung tzüpokdak ka nung yangluogo aser tzübo den külemi tzü tajungba lemsa agitsü atema tzü reservoir ka dena yangluogo.

Councilor Kazheli-i ashiba agi, iba project yagi Daklane Ward nung alirtem nem anisüngzükdaktsütsü shirmok tzü agi anüngba ajanga kanga timtemtepa aruogo. Laisa, nüburtem nüngdak peritsütsü atema iba amala lokti-i achaayanga inyakba maparentem inyaksü koda tongtibang iba indang lemsatepa liasü.



May 17, 2025 nü New Delhi nung lawyer temi 'Operation Sindoor' takok anguba atema benjungtepba den külemi India nung sepaitem nem tenünsang agüja shilem agiba noksa nung angur.

India-i alima dang kiralongra anema osang sangdongtsü

New Delhi, Monupii/May 17 (Agencies): India-i alima dang kiralongra khenyongi magizüktetba osang sangdongtsü atema team tenet shimogo; item team tenet nung lenirtemji Congress MP Shashi Tharoor, DMK nungi MP Karunanidhi Kanimozhi, BJP nungi Ravi Shankar Prasad aser Sanjay Jha na, NCP-SP nungi Supriya Sule, BJP nungi Baijayant 'Jay' Panda aser Shiv Sena nungi Shrikant Shinde nung lir.

Party balala nungi MP tem jagi tongtibat partner linük aika semdanga India-i kiralongra khenyongi magizüktetba osang lemsateptsü.

Parnokisa UN Security Council nung züngsem linüktema ajurutsü.

Honibarnü Parliamentary Affairs Ministry-i sangdong ka ajanga, "Party balala nungi shimtetba teloktemi kiralongra dak sendakba nung India nung tangatetba aser kiralongra tapu ajak anema raraba osang sangdongtsü," ta metetdaksü.

"Parnoki alima dang linüki (India-i) kiralongra khenyongi magizüktetba osang sangdongtsü. Sorkari item lenirtem kanga kümdanga shimogo, kechiyong parnokji yimtenren party balala nungi lir," ta kasa sangdong ajanga metetdaksü.

Team tenet nung lenirtemji ruling National Democratic Alliance (NDA) teloktep nungi pezü aser opposition INDIA teloktep nungi asem lir.

April 22 nü kiralongrartemi Jammu & Kashmir kübok Pahalgam amakba sülen

oppositon-i sorkar inyaksangshi ajak pusema arudar.

Taoba mapang Union Minister aser Congress MP, Shashi Tharoor leniba nung opposition lenir aikati India-i Pakistan aser Pakistan-occupied-Kashmir nung kiralongrartem camp amakba atema sorkar nem tenünsang agütsüogo.

Shashi Tharoor leniba nung team-i US nung lenirtem aser UN lenirtem ajurutsü.

Parliamentary Affairs Minister Kiren Rijiju-i X ajanga, "Kanga tongtibat mapang nung Bharat longjema lir. Party balala nungi shimtetba lenirtem jagi tongtibat partner linüktem semdangtsü aser asenoki kiralongra khenyongi magizüktetba osang lemsateptsü. Tangatetba balala liaka yimtenren dang nungibo linük telongjem tongtibatba ta sayur," ta metetdaksü.

Osang angazükba agi, Prasad-i aniba teloki Saudi Arabia, Kuwait, Bahrain aser Algeria linüktem semdangtsü aser Supriya Sule-i aniba teloki Oman, Kenya, South Africa aser Egypt linüktem semdangtsü.

Sanjay Jha-i aniba teloki Japan, Singapore, South Korea, Malaysia aser Indonesia linüktem semdangtsü. Item linüktem nungbo Muslim nütsüng aika lir.

Team shiaji MP 6-7 lir aser team shiai linük 4-5 shi semdangtsü.

Team balala nung züngsem MP tem rongnung - Anurag Thakur, Aparajita Sarangi, Manish Tewari, Asaduddin

Owaisi, Amar Singh, Rajiv Pratap Rudy, Samik Bhattacharya, Brij Lal, Sarfaraz Ahmad, Priyanka Chaturvedi, Vikramjit Sawhney, Sasmit Patra aser Bhubaneswar Kalita nung densema lir.

Taoba mapang Union Minister aser Congress lenir Salman Khurshid bo MP masü saka pa-a Jha-i aniba team nung shima lir.

Sorkari Trinamool Congress MP, Sudip Bandyopadhyay danga shilem agitsü asüngdanga liasü, ajisüaka pa temang manemi aliba ajanga pai magizük.

Pahalgam amakba sülen India-i Pakistan ya kiralongra pusema linük ta alima dang sangdongtsü meranger, ajisüaka Pakistan-ibo Kashmir ken o ya tongtibatba kümdaksütsü meranger.

Shashi Tharoor-i X ajanga, party ajak nungi shimtetba team nung pa lenir asütsü sorkari shimba atema pelar, ta lemsatep

Tharoor-i X ajanga, "Linük dak sendakba tongtibat onük atema kodang kü nübo nüngdakdir ni azünga dang lir. Jai Hind!" ta metetdaksü.

Shinde-i X ajanga, "Onoki alima linüktem dang, India nung kiralongratsü atema tesem mali aser Pakistan-i maneni parnok li nung kiralongrar jenokdaksür ta sangdongtsü. Linük atema tongtibat mapang nungbo telemsa mali saka teinyaktsü mapa dang lir," ta metetdaksü.

India-i Operation Sindoor ya khenpiga atema anena atar dang; kidanger linüki kechi inyakdir iba dakji dang keta lir, ta metetdaksüogo.

Sorkari Kashmiri nung temeden kümzüktsüla: Asaduddin Owaisi

New Delhi, May 17 (Agencies): Honibarnü AIMIM party tongti lenir, Asaduddin Owaisi-i, kiralongrartemi Pahalgam amakba sülen Kashmir nung maneni longkak aitba ajanga Kashmir nung nüburtemi Pakistan sendokba kuli sayur, ta metetdaksü.

Paisa Ato kilonser Narendra Modi aser Union home minister, Amit Shah na dang iba maongka ya agia Kashmiri nung agizüktsüla, ta ashi.

"Atangji iba ya sorkar, Ato kilonser Modi aser home minister Amit Shah atema maongka tajung lir. Parnoki iba maongka ya junga agitsüla. Nenoki Pakistan anema inyaksüla saka nenoki Kashmiri nungera agizüktsüla," ta Owaisi-i ashi.

"Kashmiri nung agizüktsüla" tetezüji kechi?, ta asüngdanga langzüdang Owaisi-i, "Sorkari iba region nungji meimchir temeden balala kümzüktsü atema inyaksüla. Parnok nem temeden

agütsütsüla. Linük tesem balala nung Kashmiri nung kaketshirtem anema meinyaktsüla. Item ajakji inyaksüla. Asenoki iba maongka magii meyutsütsüla. Kashmiri nungeri kechi tia ajurudir ajurudangkjang, ta masütsüla saka parnok kümzüktsüla," ta ashi.

"Pakistan-i India nung telemsa adokdaksütsü meranger. Pakistani ISI aser Pakistani sepaitemi Bharat tashi meitdaksütsü nükjidong yur inyak tashibo Pakistan dak temelung malemtsüla," ta paisa ashi.

India-i linük aika semdanga kiralongra magizüktetba osang proktsü atema shimba MP tem rongnung Owaisi-a densema lir.

Iba dak sendakba nung Owaisi-i, "Iba ya party dak sendakba masü. Onok mapusodang senden ka mena ajak tejangja jembitsü. Iba mapa ya kanga tongtibat. Iba mapa inyaksü atema ni kü tajungtiba agi merangtsü," ta metetdaksü.

NIA-i Mumbai nung ISIS züngsem ana apu



May 17, 2025 nü Mumbai nung National Investigation Agency (NIA) aser police-i Hokolbar aonung Mumbai International Airport Terminal 2 nung apuba ISIS züngsem ka anir aodang tangokba noksa nung angur.

New Delhi, May 17 (Agencies): National Investigation Agency (NIA)-i Mumbai airport nung ISIS züngsem ana puogo, ta Honibarnü ketdangsertemi metetdaksü.

2023 küm Maharashtra kübok Pune nung IED yanglua tendanga ken o dak sendakba nung ketdangsertemi tena bushia liasü.

Diaperwala ta ajasang Abdullah Faiyaz Shaikh aser Talha Khan naji Indonesia kübok Jakarta nungi meyipa aruba sülen Mumbai International Airport Terminal 2 nung Immigration ketdangsertemi tena apu. Iba sülen NIA-i tena puer ao.

Mumbai nung NIA Special Court kati tena anema non-bailable warrant agütsüba sülen tena tesüiba küm ana tashi jenshia liasü. Iba mapang nungji NIA-i tena aputsüsa osang agütsürtem nem senpet lakh asemsem (lakh 3) agütsütsü, ta

sangdonga liasü.

Tena den tang judicial ket nung ISIS Pune sleeper cell züngsem 8 lir.

Islamic yimsüsüba amenoktsü atema parnok India nung tesünep raksatsütsü atema asalentong yanglua liasü.

ISIS züngsemtem jagi Pune kübok Kondhwa nung Abdullah Faiyaz Shaikh'er kidang IEDs bomb aika yanglua liasü. 2022-2023 küm parnok bomb yangluba workshops agi aser IED ka tendanga liasü.

Tamalen NIA-i parnok 10 prongla anema UAPA, Explosive Substances Act, Arms Act aser IPC kübok Arla balala nung ajemdaker ken o benoka liasü.

Tamalen apuba ISIS züngsemtemji Mohammed Imran Khan, Mohammed Yunus Saki, Abdul Kadir Pathan, Simab Nasiruddin Kazi, Zulfikar Ali Barodawala, Shamil Nachan, Akif Nachan aser Shahnawaz Alam nung lir.



May 17, 2025 nü New Delhi kübok Daulatpur yimdak aluyimertem lumia longkak aitba tembangba mapang Delhi Water Minister, Parvesh Verma-i aluyimertem nem 'juice' agütsüdang tangokba noksa nung angur.



TIR YIMYIM

YIMOBILEM (EDITORIAL)

DIMAPUR SUNDAY, MAY (MONUPII) 18, 2025

Tsüngremi mamatettsüsa inyakba

Asenoki Tsüngrem dang meimba aser amangbaji Pa tsüngdangbo kanga tilaka asütsü amai bilema alitsü akok. Ajisüaka, asenoki Tsüngrem pelatsüsa mapa tilaka inyakba mesüra tenla tilaka agütsüba ajanga Tsüngrem kanga pelar aser ibaji Pai teti bilemtetter. Aji oda, asenoki Yisu dang meimba ajanga alima mesama tashi asen tenüng mamatsüsa Paibo inyaker. Yisu joko alima shi taküm tembangtsü anogo mapang anasa aruba mapang ka, kenü Pa Bethani nung zütsüra aketer Simoner kidang mena alidang, tetsür kati sen jenti alangba teronem menemba toztü bener arua Pa kolak nung mezütsü. Atangji, tetsürla jagibo Yisu anogo ananü lir külen aputsü aser Yihuda nungertemi Pa südaktsütsü aser ano anogo asemnü lir Pa shia arutsü ta memeteti liasü südi. Ajisüaka, idakji alirtem dang Yisui ashiba ama, Pa mang aremtsü anogo anasai arur asünungji jelia tebu Tsüngremi iba tetsürlaji Yisu mang renemtsütsü yokba liasü ta angatetter. Tetsürla jagi Yihuda nung puti ungertem aser tezülurtemi bilembashisatsü aser sentong kecha memetet. Lai ka dang meteta lir, ibaji Yisuji Kümtetdakba aser Tsüngrem chir. La tamangji kanga tongmelang saka takang. Aji oda, lai Yisu meim, anungji Pa nem sen aika alangba jenjang teronem menemba toztü bener arua tekolak nung mezütsü. Lai iba ama ya Yisu arishirtem jashidaktsütsü asoshi mienyak, mesüra la nüngtugu akümtsü asoshia meinyak mesüra Yisu nem la nüng sangdaktsütsü asoshia meinyak. Lai Yisu kolak nug teronem menemba toztü mezüba jagi lai Yisu meimer ta kuli asü. Iba mapang lai o mejembi, sayutsüngi masü, sayatenya mapa meinyak, lai tangari meinyaktetba mapa balaka meinyak, saka Yisui ibo la mamatsüsa aser putusa putu alima mesama tashi la bilemtettsüsa la jak ajiok. Tanü asenok nisung tsütsü bilemdi asübo, Yisu nungi langka nüngdak aginüba agi toztü sen jenjang aika alangba la kolak nung bener oagi mezütsür südi ta bilemla. Ajisüaka, iba tetsürla mulungjang nung Yisu nungi aginüba dang nungibo Yisu nem agütsünüba tuluba liasü, ibayongji lai akokba tajungtiba agütsü aser ibaji kodanga mamatsüsa Yisui ajiok. Asenok asoshia koma amala mapa ka inyaknung dang mesüra tenla kwi aben nung dang Yisui kodanga mamatsüsa ajioktsü amai bilemer. Abrahami par jabaso ka dang aliba Tsüngrem nem tarongba tenla agütsütsü mekoru, menungnang mesüra par chir melen tanga tajung ka tenladi ta memepishi. Iba anogo Tsüngremi Abraham alima otsü nung kodanga maidoktsüsa moatsü. Iba ama tamang aser temulungjang Tsüngremi aginür. Tsüngremi asen mulungjang repranger aser asen mulungjang ajunga agi Pa meimba mapa agi sayudang Tsüngrem pelar aser alima mesama tashi asen senmang alitsüsa aser asen nüng mamai bilemtettsüsa Pai inyaker. Aji oda, Mark tapu 14 nung tetsürlai Yisu meimba mapa agi inyaka sayu ama, anogo shia asenokia asen taküm yimya aser mapa agi Yisu meimba temaitsü tangar tsüngdang sayutsü nüngdaker.

OLEMSABANG

**Ao Rijui Achaayanga agiba
“Kaket Zülur Shisamolu”,**

Rongchii 26, 2025

Onük: Ao Oshi Tamentakdak aser Lirumedem.

~ Tejembir : Mr. I. Temjen Tzüdir

(Yashi adok nungi...)

- h) Kiyimluyim nung amentakba: Otsüla oboula nunger mapang (akhi) nungi asen oshioben tera aika kiyimluyimba dak amenloka liasü. Talisa alu achidang nungi tenzüker alu roa kidangi tsük bener adokba tsüngda nung asen oshioben aika amenloktepa jembitepba lir. Akhidangbo tanü amai alu meyimaka taküm kibong ka alitsübaji tamakoktsü liasü. Oda taküm kibong ajunga amentakdak/metatakdakji aluyimba aser tsüngküm mongpu dak dang teimla ajak yur sobaliba-a liasü. Tsüngküm mongpu jungra pela-a anisüngzüka ali saka tsüngküm mongpu mejungra iba lima nungji ayawara agi kangshitep.
 - i) Meyua ok atenba nung amentakbaren: Asen Aor ya koba teka mapa wadang nung südir süaka kija-a süang lokti-a süang mapa inyakdangji meyua inyaker, meyuba ajanga ajungshiteper, kümkümshiteper, tsüngkang medemer aser tatem nung kodang waluniri ok atendir ajaki shilem agia hoi, hoi ta ashitsü aser külemi anisüngzü. Ok maten tashi shianga jurila anisüngzüksü makok, kechiaser ibaji yimya agi memelar.
- 2. Ao Oshi Lirumedem:** Tanabuba nung kodang Ao Oshi nung Lirumedem ta südir okila nung ashiba ama, julangjushi aser meputep khenyongi malitsüla, kati züluba kasaji tangar jagi-a zülutetba/jembitetba ta angatetogo. Süra züluyim nung lirumedemtsü jagi maodang iba lirumedem dak sentakba nung aseni tali angajemtsü kar rajemtsü merangdi. Ao oshi nung lirumedemtsü asoshi mezüngbuba nung;
- a) Tashi angateptsü kanga tongtibang: Kechiaser oshioben ka nung tashi angatepba melira kodanga lirumedemtsü makok (Discipline is the source of uniformity). Tashi mangatep tetezü pei bilemba dang aginüba aser pei-i angatetbaji dang tongtibang aser shitak ta bilemba nungi tashi mangatepji adoker. Anungji asen oshioben nung lirumedemtsü asoshi nisung ajaki tashi angateptsüla.
 - b) Oshioben ka lirumedemtsü asoshi nisung shia taremsük aser ajemalu nüngdaker. Taremsük tetezü puri ashibaji tim masü ama nai/ni bilemaka aser angatetaka atasa-a alitsü nüngdak. Ajemalu tetezü na temetetba aser ne tangatetba tulu liaka aser nai ashiba nungjisa atemtsü liaka ajak lirumedemtsü atema nai nübur tia asadanga tila küma atatsübaji kanga tongtibang.
 - c) Asen Ao oshi lirumedemtsü atema “lokti dang jungra kecha masü ta angatetba nüngdak”, saka ola madoki pei agitsü ka dang bilema jembiba aser inyakba jagi kodanga Aor lirumedem kati bener marutettsü.
 - d) Atsüanem nüngdaker: Tang ya joko asen Aori angatetsüogo, asenok tsüngda atsüanem kateptsü mapang, kechiaser maparen, tia jenjang aser tangari asen shinemtsüba (mezüngmeshiba) ajak yagi asenok kanga anua kümdaktsüogo. Anungji Ao senso tajungtem arung, oshioben aser asen sobaliba ajak atema joko iba ken ya dang tentepa kati ka temulungjang ajak agi agizüktepd;

*“Oh ako-trong, na pika arung-ni ... ni-ka pi-ka arudi,
Oooooh, tesem lenten nungji, asen-asen a-jurtepd....*

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Arogo nung lenirtem atema Tech4Church 2025 conference agi



Kohima, Monupii/May 17 (TYO): Honibarnü Capital Convention Centre, Kohima nung Arogo nung lenirtem / inyakertem atema Tech4Church conference agiogo; iba sentong nung Nagaland, Manipur aser Arunachal Pradesh state tem nungi Arogo nung lenirtem, media professionals, ministry teams, accountants aser secretaries 150 shi aden.

Tabernacle Technologies-i ayongzükba sentong nung, tanü digital putu nung technology teyari ajanga Arogo inyakym nung temelenshi adokdaksüba indang tesayuba balala agütsü.

"Embracing the Digital Shift" omen nung ajemdaker ayongzükba conference nung montintemi tongibang onüktem aika jembi, practical workshops aser shisa lemsatepba sentongtem agia liasü.

Iba sentong tenzükba Nagaland Baptist Church Council (NBCC) General Secretary, Rev. Dr. Mar Pongener-i tayongzükba o

jembiba den külemi sarasadema liasü.

GoodNews Group Managing Director aser iba sentong nung okila jembir, Ashvin Dhyriam-i, "Pastor tem aser Arogotemi technology upgrade mesüra Google-i tim nisungtem nem osangtsüsang tai agütsü tenzüktsü. Joko asenoki computers study asür masü saka computers-i ang asenok study asür," ta metetdaksü.

Iba conference nungsa Arogotem atema senotsü aser legal compliance dak sendakba nung tesayuba aika agütsü.

Nongothung Jungio, IRS (Commissioner of Income Tax (Admin & TPS), North Eastern Region, Guwahati aser Imlimeren Jamir, IRS (Commissioner of Income Tax (Appeals), Jorhat nati Arogotem atema sorkar compliances aser legal nüngdak balala indang jembi.

Jungio-i, "Sarutem ya asenoki loktiliba terenlok atema agütsüba jenjang lir," ta shia Arogotem dang, tang aliba temzüng-ozüngtem meteta alitsü

ajungshi.

Parnokisa, "India nung aliba Arogotem ajaki senotsü transaction atema PAN card nüngdak, saru nungi züngdokba/atokba Arogotema PAN Card ji nüngdak. Arogotem mesüra züngsemtemi Income Tax Department nungi notice ngura itemji mesendoktsüla saka tuyuba ama tim inyaktsüla," ta metetdaksü.

Kasa sentong nung Christian Media Strategist aser Highland Dawn Media Director, Wabang Moa-i Tsüngrem tenzükba wadang nung digital media amshiyim indang lemsatep aser ESAF Bank nungi Arnab Goswami-i Arogotem rongsenkettzüng tashi indang jembi.

ESAF Small Finance Bank (Title Sponsor), Our Daily Bread Ministries (content partner), Highland Dawn Media (platinum sponsor) Life Pro (Sound Partner) aser associate sponsors Megavoice aser llandlo teyaritep ajanga iba sentong takok ngua agitetogo.

UP nung anti-conversion ozüing kübok Khristan pezü apu

May 17, 2025: Uttar Pradesh state nung anti conversion ozüing kübok Khristan pezü puogo; parnoki anti-conversion ozüing alema inyak, ta parnok nem tai tongloktsü.

Khristan pezü atema ken o jembitsürtem den yaritepertem aser Arogo nung lenir kati, May 12 nü Lakhimpur Kheri district nung Khristan pezüji pua police station-i anir ao, ta metetdaksü.

Khristantem jagi tribal nisungtem nem mapa aser senotsü teyari agütsütsü ta mesüzüka Khritan yimsü dangi meyipdaksütsü meranger, ta tai tongloktsü.

Arogo lenir kati, "Ozü nüburtem sarasademtsü atema dang adenshir, ajisüaka parnok ozüing alema inyakertem ama züngshir. Ozü züngsemtem nem tiyazü nung tai tongloktsüogo, aser iba ya ozü nüburtem amokmerentsü atema lir," ta metetdaksü.

Khristana pezüji Chandan Chawki police station-i anir aoba sülen local court kati May 13 parnok police ket nung ayutsü tuyua liasü.

Uttar Pradesh Prohibition of Unlawful Conversion of Religion (Amendment) Act,

2024 ya India nung anti-conversion ozüingtem rongnung tesashiba lir. Iba ozüing kübok aibelener ka küm 20 tashi tepuokdak ayutsü akok.

Arogo lenir jagisa, "Nisung kar kidang sarasademtsü adenshiba-a yimsü meyipdaksüba sentong agir, ta tai tongloktsür. Sademsadema tekülem sentong agitsü atema temeden makai kümogo," ta metetdaksü.

Nütsüng million 200 dak tali aliba Uttar Pradesh state nung Khristantem anema inyakba kanga bulua akümer.

United Christian Forum (UCF)-i ashiba agi, taküm küm kija nunga January ita nungi April ita tashi nung Uttar Pradesh nung Khristantem anema inyakba tatalokba 50 liasü.

Taküm January nungi April ita tashi nung India nung Khristantem anema inyakba tatalokba 245 lir, ta UCF-isa metetdaksüogo.

Anti conversion ozüing anema Supreme Court nung ken o aika benoka lir. Tawa Supreme Court-i Uttar Pradesh nung anti conversion ozüing anema benokba temepishiba ken o angadangtsü melungogo.

ANOGO ABEN TSÜNGREM DEN

TSÜNGREM MATENBA SHISATSÜ ASOSHI TEKÜMDANGTSÜ

Kechiyong iba lima shisatsüji Tsüngrem madang tamashi lir. Zülua aliba ama, "Tsüngremi shisa takartem parnok sangrasangji nung apur." 1Korint 3:19

Asenoki Lipok tapu 11 nung Babel Lungki Shinar lima nung Noa nungi jazüka aortemi kanga dang sangrasangjia par khonang tenüng ayutsü atema yimti ka lungru agi anüng tashi tua yanglutsü pangjem. Saka iba tasa aser mapaji Tsüngrem matenba, iba lima shisatsü koba nung nisunger tasa tena lir, iba jagi mapa tenzük saka takok mungutet, tamakok dang masü saka maksü ajuruba ya nisungi tasa balala yangludangaka Tsüngrem sentong mesüra amajok nungsa tempanger. Isaia 55:8 nung ashir, kechiyong Kü tebilembatem nenok tebilembatem masü,mesüra Kü sentongtem nenok sentongtem masü, ta Kibubai ashir.

Akidang nungi tashitemetetertertem aika adokogo saka iba lima shisatsü koba nung Tsüngremi mumulungba aika dena lir, iba jagi Tsüngrem mepelaba mapa aika inyaker ano aika yirudaktsür. Nisung shisatsü nung sangrasangji atener, iba jagi konang, tetushi, tulu shisangba, ochimashi, ngasangatem, mezümeküm mapatem temai adokdang Tsüngrem tsüngdang tamashi akümer. Meimchiri kechi koma ka bilema, jembia inyakaka kenübosa jungkai adoker. Idangjibo shisa akar, makar ajak pei mapa yari ta-a angutsü. Koba ta-a ka aseni angutsü kanga nentaka shisadangdi aser kodanga sama-a maoba teti tatem maka taküm senmang angutsüsa shisa ka-a inyakdi.

Madhya Pradesh nung SIT tentetba atema Khristantem shisabulur

May 17, 2025: Madhya Pradesh nung kangshia tamangba yimsü meyipdaksüba ken otem bushisüngdangtsü atema May 6 nü Special Investigation Team (SIT) ka tentetba sülen Khristantem shisabulur, ta International Christian Concern (ICC)-i metetdaksü.

Madhya Pradesh Police-i sangdong ka ajanga, "Sensaker aser makamaiter kibongtem nungi tetsürtem ashikülak ajanga mesüra mesüka yimsü meyipdaksütsü atema inyaksangshiba intelligence osang ajanga metetdaksüogo," ta ashi.

"Item ama tatalokba nung takoksa angurtemji amokmeren, rongshiba mesüra ashikülak ajanga yimsü meyipdaksür. Item ama tatalokba ya ozüing alema inyakba dang masü

saka loktiliba nung tetsürem akhümket aser temeden anema lir," ta parnokisa metetdaksü.

Iba ya Hindu nationalist teloktemi Khristantem aser tanga minority teloktem anema inyaktsü atema ketdangsertem asalentong ka asütsüa akok, ta Khristan lenir kari metetdaksü.

Madhya Pradesh nung Khristantem anema inyakba ken otem nung Khristantem nungita yarir activist, Goel Dharma-i, "Linük anema inyakba tatalokbatem atema dang SIT tenteter, ajisüaka tang state sorkari SIT tentetba yabo nütsüng ajema alirtem amokmerentsü atema inyaksangshiba lir," ta metetdaksü.

SIT nung chairman ji Bhopal (Rural) Inspector General of Police asütsü

aser züngsemtemji additional commissioner of police (Crime & Headquarters), Urban Police Bhopal; assistant inspector general of police, Women Safety Branch aser superintendent of police, State Cyber Cell nunger lir.

D h a r m a - i s a , Khristantemi shidak dang benshia lira SIT-i bushisüngdangaka Khristantemi aibelena inyakba kuli mangutsü, ta ashi.

Madhya Pradesh nunga anti-conversion ozüing tesashi lir aser iba ozüing kübok pastor tem aser Khristantem aika jail nung puoka lir.

Anti conversion ozüing kübok Khristantem anema inyakba mapang ano tang SIT tentetba ya ajanga Khristantemi ano timtem taliba ajurutsüa akok.

AO OSHI ANGAZÜKDAK:**TANÜ ANGAZÜKTSÜBA OJANG**

Temulungnura

(adj) langka chir saksünütsü atuba (feeling of nauseous)

* Mersü tashi achirtem temlungnura timtem agi kangshir.

Temzü

(v) tebur aser shiruru tebong tanur aser techanu malitsü atema yangluba (castration/ vasectomy)

* Akhi mapang temzü nisung nem chubatsür nükdaktsü.



Tir Yimyim

OLONG PAITEP # 7154

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN		LANGTSÜNGLEN	
2. Auonung chiyongtsü asenba	-(7)	1. Lenmang	-(7)
5. Mangyimba mapang	-(5)	2. Aor kidong ka tenüing	-(6)
7. O tamendakdak	-(4)	3. Tenarong maten	-(6)
8. Peidak malangba	-(7)	4. A ____ g	-(3)
10. Juli	-(7)	6. Mopung apodoka	
12. Sen ayudak	-(7)	ola adokdaktsüba	-(3)
14. Tenük agi ajitet	-(4)	9. Tongtipang tagitsü	-(7)
15. Tamajung aküm	-(5)	10. Menungra bilem	-(6)
16. Apuso	-(7)	11. Aiür	-(6)
		13. S ____ k	-(3)
		14. T ____ r	-(3)

OLONG PAITEP # 7153 TELANGZÜBA

TIPIEN :	LANGTSÜNGLEN :
1. Tesüingjem, 5. Tetemsü, 6. Oru,	2. Entsü, 3. Mersü, 4. Otia,
8. Rür, 9. Ozü, 11. Lemjem, 14. Anü,	10. Zünga, 12. Jakla, 13. Maka.
15. Longkak, 16. Ashikülak.	

**TENYARI ALOKBA DANG MANENI ASÜNGDANGER**

Tenyari : Alokba, ner lima teinyaktsü tasakji kechisa ?

Alokba : Aika lir saka ni kar shidi,

1. Tasür kidang Pa / La mejungaka Kanga junga liasü ta ashitsü Koda tasak!
2. Ambulance gari meshitetdang iba gari yagi ayanga chiyonga alitsü tasü mang aika moajang ta ashitsü Kanga tasak saka drivertemibo aji nungdaker,
3. Sadir kidang balalula tesümano ta ashitsü kanga Saker, saka mesadidangyungi timbaka balatoker ,
4. Mozüki ka meshitetdi ta süra shiranger aika iba mozükidangi arudakjang ta Koda mashir, saka kariibo aji jangrar,
5. Ano Moatsü aser tsüngremmong benjong nung sarasademtsüdang ozü tsürabur yimsüyimpong mesamai züinjang ta ashitsüsa akümer,
6. Yi ayoker jagibo yijemer aika arudakjang ta temolungjang nungbo sarasademer südi,
7. Tongtipang kaji coffin ayokba dakan tasenka lapokja moatsüdang Koda sarasademla ??????

Tenyari : Alokba, ner lima ibala mesükba mapa ano aika lirnno !!!!!

Lilir :I. Kilang Ajem, Indisen Dimapur.

Sarbananda Sonowal-i anir Tiranga Yatra agiogo

Dibrugarh, May 17, 2025

(Agencies): Union Minister of Ports, Shipping & Waterways, Sarbananda Sonowal-i Hokolbarnü Dibrugarh aser Manav Kalyan nung Tiranga Yatra sentongtem nung shilem agiogo.

Operation Sindoor takok anguba atema tenüingsang agüja Dibrugarh kübok Chowkidingee aser Tinsukia kübok Manav Kalyan nung item sentongtem agia liasü.

Indian Armed Forces aser Prime Minister Narendra Modi lenisüba nem akhümtsübu agütsüba den pelaba lemsatepa item sentong ayongzüka agi.

"Operation Sindoor takok anguba ajanga asen Armed

Forces dak tashi, tasü aitba aser bendanga agütsüba kuli agütsür. Asenoki maneni Pakistan aser kiralongraba anema takok nguogo" ta Union Minister Sarbananda Sonowal-i ashi.

"Iba ajanga kiralongrartem aser parnok jenokdaktsür Pakistan nem osang tejangja ka sangoktsür. India-i kiralongraba magizüktsü aser kari danga langka inyakra mapang shitak nung telangzüba agütsütsü ta asenoki sayuogo. Prime Minister Narendra Modi lenisüba tajung ajanga iba ya New India ta sayutetogo" ta pai ashi.

Tanü Dibrugarh aser Tinsukia nung 'Tiranga Yatra' nung adenba atema kanga pelar aser nüma atanger. Iba ajanga asenoki asen

Armed Forces nem salem abener aser Pakistan-i yariba kiralongraba maparen inyakba anema telangzüba tajung agütsütsü atema tenüingsang agütsür. Prime Minister Modi lenisüba kübok India ya tapet telangzüba agütsüba linük ka kümogo, Sonowal-i metetdaktsü.

Prime Minister Narendra Modi lenisüba kübok Tiranga Yatra ya linük longjemba aser konang sayuba tamaitü tulu ka kümogo.

Tesüba nung PM Narendra Modi-i senso shia dang Tiranga Yatra nung adentsü aser India-i pei litsü kümzüka ayutsü atema bangjema aliba akangshitsü ayongzüka liasü.

Manipur CRPF ketdangsür ka Jharkhand nung tsüingi agi aiset

Imphal, May 17, 2025

(Agencies): Jharkhand nung Maoist anema maparen inyakba mapang lendong ka atalokdang Manipur nungi CRPF ketdangsür ka asü.

Chaibasa kübok Saranda forests nung Maharabam Prabo Singh (46) tsüingi agi aiset.

Singh ya Manipur nung West Imphal district nungi liasü.

Brihostibar aonung 5:30 ako meta tzunglu kanga tulu aru aser idangji 26th Battalion nung S e c o n d - i n - C o m m a n d

Maharabam Singh ya Jharkhand Police den külemi joint operation ka nung liasü.

Maoist nunger alidak Baliva forests nung parnoki mita aodang lendong atalok.

Iba arem nung parnok anasa tsüingi aidang Singh kanga mejungi yirur MKCG Medical College and Hospital-i anir ao saka pa süadok.

Iba lendong nung nisung asem kanga mejungi yirua lir. Parnokji Assistant Commandant Subir Mandal (CRPF), Assistant Sub-

Inspector Sudesh (Jharkhand Jaguar Force) aser Assistant Sub-Inspector Chandlal Hansda (Jharkhand Jaguar Force) nunger ta jangjaogo.

"May 15, 2025 nü 26 Battalion CRPF ajanga anti-Maoist operation ka agidang Second-in-Command Shri Maharabam Prabo Singh tsüingi agi aiset. CRPF-i tasütait ketdangsür nem akhüm tetushi agütsür. Iba mangyimba mapang CRPF-i asür kibong den asükhu lemsateper" ta CRPF-i metetdaktsü.

Assam police-i taila sen Rs 9.97 crore aser taila hon seret 494 puogo

Guwahati, May 17, 2025

(Agencies): Assam Police-i küm pezü tashi taila senotsü benshia aruba anema inyaka arudang sen aika puogo aser iba mapa inyaker telok aika makdokogo.

2021 nungi tenzüker Assam Police-i Fake Indian Currency Notes (FICN) Rs 9.97 crore aser taila hon seret 494 puogo.

A s h i k ü l a k e r t e m i rongsenketzung jenjang raksatsütsü aser tai maketba sensotem nungi tajangzüka agiba azüoktsü atema Assam police-i inyaka arur.

Chief Minister Dr. Himanta Biswa Sarma'er sorkar lenisüba kübok ozüing amertem akangshitsü atema inyakba

nung iba ya tongtipang mapa ka lir.

Assam Police ketdangsürtemi counterfeit crimes tera nungi atsüdoktsü nangzüka metetdaktsüogo aser sensotem dang kümdanga alitsü aser temulung malemba maparen inyakba osang sangoktsütsü ayongzüko.



Guwahati nung Beltola bazaar anasa arishi küm 50 tain tantsür Anju Rongpi jara chirepdang asüba sülen nübortemi iba tesem nung lungkak aitba angur. Iba lendong ya Brihostibar nü atalok aser jara kanga tejen ka liasü aser iba atema nübortemi Guwahati Municipal Corporation (GMC) aser Assam sorkar dak tai tongloktsür. Beltola bazaar nung Bahini River anasa brick guard wall ka kanga tejen lir aser iba ya melentsü atema mapang talangka ka takhangba agüja arur.

Russia-i Ukraine nung bus ka amak; civilian 9 tepset



Russia-i Ukraine nung bus ka poksatsüba noksa nung angur

Kyiv, Monupii/May 17 (Agencies): Russia-i Ukraine northeast len drone amshia civilian bus ka amakba sülen nisung teku tepsetogo, ta local ketdangsürtemi metetdaksü. Sumy regional military administration-i ashiba agi, Honibar anepdang iba bus ya Russia den arrtsü anasa regional yimtiba Sumy-i oya aliba mapang Bilopillia jila nung amakba sülen ano nisung pezü tashi yirua liasü. 2022 küm sülen Russia aser Ukraine na yimjung atema indang indanga mezüngbuba sensak asema sülen ghonda ishika dang lir iba tesem ya maka liasü. Sensaksem nung yimjung atema takok ngua sensak mesemtetaka tepuokertem melenteptsü mulungtepogo.

Ukraine indang national police-i iba bus amakba ya rara nung aibelen ka ta shiogo. Bus amakba dak sendakba nung Russia-i kecha telangzüba magütsü, saka parnoki Sumy nung military tamendakdak ka makogo, ta ashi. Police service-isa sangdong ka ajanga ashiba agi, "Russia nung army-i inyakyim mesüra international temzüng ozüng aser humanity kecha mesükshi-i ano civilian oset ka dak kongshiogo." Sumy regional tekolakba Oleh Hryhorov-i ashiba agi, iba bus ya Honibar anepdang Russia indang Lancet drone-i 06:17 nung maka liasü. Iba bus amakba ya meimchir inyakyim ka masü ta pai ashi. Hokolbarnü Turkey kübok

Istanbul nung sensaksemba mapang yimjung atema hai haura ka-a mejembitet, kechiyong Ukraine aser Russia na rara tembangdaksütsü atema tebilemba khenyongi balala lir. Ajisüaka taruba anogo ishika tsüingda linük anapronglai rara nung apuba tepuoker 1000 melenteptsü bangjemogo. Russia-i 2022 küm February ita nungi Ukraine amak tenzük. Ukraine-i August ita Russia kübok Kursk tesem amaksü atema Sumy ya tamendakdak ama amshia liasü. Russia-i taküm küm tetenzüklen Ukraine nung sepaitem timba mintokogo aser tawa arrtsü aden artillery amshia amakba den anüing ajanga tesem balala tali maka arudar.

Israel-i Yemen nung port ana amak



Israel-i Yemen anüolen Hodeidah port amakba sülen iba tesem nungi mokozü atokba noksa nung angur.

Jerusalem, Monupii/May 17 (Agencies): Houthi teloki Israel dak missile khaloktsüba atema telangzüba agüja Israel-ia Yemen nung Hodeidah aser as-Salif port makogo. Yemen nung amendaker aliba iba telok yagi US den ceasefire atema nangzüktepba sülen anogo ishika lir iba ya ataloka liasü. Israeli military-i ashiba agi, paroki Hokolbarnü kiralongrar indang infrastructure tem amak. Parnokisa X ajanga ashiba agi, iba port ana ya Houthi teloki prangbong injang aser hadir balala belenshitsü atema amshia liasü. Houthi-affiliated outlet Al Masirah TV-ia Israel-i iba port ana amakba metetdaksüogo. Port koma raksa mesüra nisung asüba aser yiruba indang osang

tejangja mali. 2023 küm October ita nungi Israel-i Gaza amak tenzükba sülen Palestine nungertem pusema Houthi teloki Israel kübok tesem balala maka arudar. Kasa mapang nung Israel-ia meyiper Yemen nung Houthi pur tamendakdak balala makdar, kong May 6 nü Sanaa nung Yemen indang airport tongtiba maka nisung aika tepsetba densema lir. US tir Donald Trump-i iba ita tetenzüklen Houthi telok den ceasefire atema tenangzüktepba yangluba sülen Hokolbarnü mezüngbuba Yemen nung tesem balala makogo. Houthi teloki Red Sea nung rongtem mamaksü mulunga agizükba sülen US-ia

Yemen nung tesem balala amakba anena liasü. Ajisüaka iba tenangzüktepba nung Israel maden aser parnok indang military-i ashiba agi, parnoki iba hopta Yemen nungi yokba missile tem aika khadangogo. Israel Ato Kilonser Benjamin Netanyahu-i Hokolbarnü ashiba agi, tesem balala amakba ya tetenzükler dang. Paisa, Houthi telok ya hadir ka dang ta shia item ajak ya Iran mapa lir ta ashi. "Onok süngjem süngjema atar Houthi pur nem onok meyrudaksütsü. Onoki tashi tuluba agi parnok meyiper amaksü, kong onok amaksü atema tetuyuba agütsüba lenirtem aser infrastructure tem ajak densema lir," ta pai ashi. Israel Defence Minister Israel Katz-i, Israel dak maneni missile khaloktsüra Houth lenir Abdel-Malik al-Houthi bushia samatsütsü, ta tenangzükb agütsü. Katz-isa, Hamas commander Mohammed Deif aser Yahya Sinwar na, Hamas political chief Ismail Haniyeh aser Hezbollah lenir Hassan Nasrallah nung ama al-Houthi-a tepsettsü ta ashi. Parnok ajak ya taoba küm Israel-i tesem balala nung tepseta liasü.

Gaza ceasefire atema sensaksem tenzükogo: Hamas

Cairo, Monupii/May 17 (Agencies): Gaza ceasefire atema Hamas o Israel na tsüingda Qatar kübok Doha nung sensaksem tenzükshiogo, ta Hamas ketdangsür Taher al-Nono-i Reuters dang Honibarnü ashi. Pai ashiba agi, telok ana yagi jelia takhangba kecha magütsü onük ajak benoka sensaksemdar. Nono-i ashiba agi, ken o sensaksemsürtem nem teyari agüja iba sensaksem takok ngudaksütsü atema takokba tashi teyari agütsütsü atema Hamas pur tejangraba lir. Israel-i Gaza kübok tesem kar azüoktsü atema parnok inyakyim atsülangshitsü renemba mapang tang ceasefire atema sensaksem tenzükogo. U.S. tir Donald Trump-i Middle East semdangba Hokolbarnü tembangba sülen sensaksem ya tenzükshiogo. Pai iba tesem semdangba mapang ceasefire atema sensaksem tejakdangi bener motet. Ajisüaka pai Gaza nung yatzür tali akümba aser chiyongtsü aser tanga tenüngdakba osettem bener yoktsü nüingdakba lemsatepa liasü. Ceasefire atema sensaksemba mapang Israel

indang airforce-i taoba ghonda 24 tsüingda Gaza nung Palestine nung 146 tepsetogo aser aika yirutsüogo, ta local health ketdangsürtemi Honibarnü ashi. March ita sensaksem chirepba sülen Israel-i Brehostibarnü Gaza tesashitiba makogo. "Ayaterem nungi tenzüka asür 58 anir aruogo aser kasa mapang nung nisungtem aika ki ajaras aliba nung sabanger lir. Mozükidang tensa kanga mejungi lir," ta northern Gaza, Marwan Al-Sultan nung Indonesian Hospital director-i ashi. Local health ketdangsürtemi ashiba agi, taoba ghonda 24 tsüingda Israel-i tesem balala amakba mapang nisung 459 yirutsüogo. Israel military-i Honibarnü ashiba agi, Gaza Strip nung inyakyim atsülangshitsü aser tesem balala azüoktsü atema renemshiba mapang tesem balala makdar. Gaza health system ya junga inyaksangshi mesütemi arudar, kechiyong ita 19 raraba mapang Israel military-i mozükitem aiben makdar aser ano parnoki tenokdangba agütsüba ajanga medical supply tem agi kanga anünger.

Taoba South Korea tir Yoon-i party toktsüogo



Taoba South Korea tir Yoon Suk Yeol

Seoul, Monupii/May 17 (Agencies): South Korea nung mapa nungi anentsür aliba taoba tir Yoon Suk Yeol-i Honibarnü Facebook post ka ajanga pai conservative People Power Party (PPP) toktsüba metetdaksüogo. June 3 nü election magi tsüingda pool agiba nung PPP indang tir candidate-i liberal Democratic Party candidate Lee Jae-myung vote aika agi memenepi aliba mapang ka nung Yoon-i iba osang sangdongogo. Gallup Korea poll ka ajanga Hokolbarnü, nüburtem shilem 29 shi-i PPP presidential candidate Kim Moon-soo pusemba aser Lee pusemer shilem 51 aliba sayuogo. Yoon, shibai December ita martial law benokba atema aija mapang nungi anenja liasü, pa dang party züngsemtemi party toktsütsü atema ayongzükogo. Pa inyakyim ajanga party tetsükdaksü adoker ta bilema

pa dang party toktsütsü shiogo. "Republic of Korea kümzüka ayutsü atema kü khuret ataloktsütsü asoshi ni People Power Party toktsür.. Yimlibilema nenoki Kim Moon-soo pusemang," ta Yoon-i ashi. Taoba tir Yoon Suk Yeol-i taoba küm martial law benokba sülen linük mepetmesü tului ai. Pai ashiba agi, bendanger tashi balala nungi linük kümzüka ayutsü nükjidong nung pai iba jenjang agi ta shiogo, ajisüaka iba jenjang agiba ya magizüki ozüng yanglurtemi parliament nung vote asü aser pa mapang nungi suspend sütsü. Iba sülen okadak ita ishika ken o angadanga sülen Yoon-i aibelenba ngutet aser pa mapa nungi anenja liasü. Pa mapa nungi maneni tsüingda Yoon pusemertem aser pa anemertemi hoptashia ama longkak aita aruogo. Candidates Lee aser Kim na Deobarnü mezüngbuba yimja nung olangteptsü renema lir.

Doha Diamond League nung Chopra-i silver angu



Neeraj Chopra

Monupii/May 17, 2025 (Agencies): India nunger nungtugu javelin throw asayar Neeraj Chopra-i Hokolbar aonung Doha Diamond League 2025 nung alizüng tasen ka tongteta pa indang career nung tang mezüngbuba tebur javelin throw asaya nung nület meter 90 adena tsütetogo.

Chopra-i nület ya 90.23 metres tsüteta pa ya iba asaya puti otsü nung iba alizüng tongteter 25buba kümogo. Pai alizüng tasen ka tongteta asayaka Chopra ya tanabuba jenjang nungang tembang, kechiyong Germany nunger asayar Julian Weber-i nület meter 91.06 tsüteta liasü.

Qatar Sports Club Stadium nung asayaba mapang Neeraj-i asaya kanga junga tenzük aser nület mezüngbuba meter 88.44 tsüa pa temaba

jenjang nung toktsü. Pai nület tanaben atsübabo foul asü saka tasembenbuba atsüba mapang pai javelin ya metres 90.23 tsüteta liasü.

Iba alizüng tongtetba ya Chopra atema pa indang career nung nület talangtiba atsüba dang masü saka pa elite 90m club-ia iogo, koba javelin throw asaya nung gold standard ama züngshir.

Ajisüaka Julian Weber sentong balaka liasü. Germany nunger asayar yagi Diamond League circuit nung teti junga dang asaya arudar aser pai nület meter 91.06 tsüteta Chopra ajateta aser temaba jenjang nung asaya tembanga liasü.

Neeraj indang career nung tang jangrademtsü mapang ka nung iba alizüng tongtetogo. Pa tang Olympics asemben koker aliba aser world record

(98.48m) yanglur alisang coach Jan Zelezny tawabangba kübo asayadar, aser pa kanga mazüngi asayatsü aliba athletics season tenzükba mapang ka nung junga asaya tenzükogo. Coach melenba sülen Chopra tang mezüngbuba tongtibang asayamung ka nung asayaago aser Olympics o tanga tongtibang asayamung tem masayatsü tsünga Doha nung junga asayatetba ajanga pa dak tali timla akatsü.

Doha meet ya kanga tongtiba liasü kechiyong NC Classic 2025 athiba sülen Chopra iba ita tatemlen metokteptsü.

Kasa asayamung nung India tsür Parul Chaudhary-i tetsür 3000m steeplechase nung alizüng 9:13.39 nung tongteta national record tasen ka yangluogo.

DIPR-i open penalty shootout akok



Asayamung ayongertem den open penalty shootout asayamung akokba DIPR team tangokba noksa nung angur.

Dimapur, Monupii/May 17 (TYO): Kohima Baptist Khriesariü Krotho-i ayonzüka May 17 nü IG Stadium, Kohima nung asayaba open penalty shootout asayamung DIPR-i kokogo.

Final kanga toktepba asayaba sülen DIPR-i goal 4-3 agi Rabbi SZBKK koka iba asayamung title benogo.

Open penalty shootout asayamung akokba team nem senpet sen 30,000 aser runners-up Rabbi SZBKK nem 20,000

agüja liasü.

Tobu Brothers NU tasembuba jenjang nung liasü aser parnok nema senpet sen 10,000 agütsü pezübuba nung tembangba Cola Brothers team nem senpet sen 5,000 agüja liasü.

DIPR-i iba asayamung akokba den par team nungisa Tsukjemwati Lkr nem Best Goalkeeper of the tournament agütsü aser pai ball kanga junga nokdangba atema pa nem senpet sen 3,000 agüja liasü.

Iba asayamung ya knockout format nung asaya, kong Kohima jila kübok tesem balala nungi team 31-i shilem agia iba asayamung kanga takok ngudaktsüogo aser iba den asayamung ajanga local tem sempet sayutsü asoshi maongka tajung agütsüogo.

Asayamung ayongertemi, team tem tsünga tanüla tajung nung toktepba aser football asaya jangrartemi parnok sentong nongita yariba atema kanga pela lemsatepogo.

Roston Chase West Test captain kümogo

Monupii/May 17, 2025 (Agencies): Roston Chase West Indies Test captain asütsü shimogo. Pa iba format nung küm ana dak tema masayaka captain asütsü shimogo.

Arishi küm 33 tain all-rounder yagi Kraigg Brathwaite melenogo, shibai asaya 39 sülen March ita captain mapa tokja liasü.

Cricket West Indies (CWI)-i Chase den külemi iba mapa atema asayar pongu shimdang, kong Joshua Da Silva, John Campbell aser Jomel Warrican nunger densema liasü.

Psychometric testing densema lenla trok nung asayartem ya kanga junga asadangba sülen Barbados nung asosang Chase ya shima liasü.

West Indies coach Daren Sammy-i ashiba agi, pai Chase shimba pusemer. Chase nem arishi küm 32 tain vice-captain Warrican-i teyari agütsütsü.

"Onok captain tasenba

külem asayartemi akümtsübur aser pai iba mapa den sendaka aliba khuret angateter," ta Sammy-i ashi.

Chase-i tang tashi nung Test 49 asayar lir aser pa tatemsa South Africa den 2023 küm March ita asaya liasü. Iba sülen West Indies pur Test asaya 13 asayaago.

Chase-i Test asaya nung run 2,265 yanglur lir aser pa indang average 26.33 lir. Pai century pongu yangluogo aser wicket 85 agir lir.

Test captain ama pa lenisüba nung par team June 25 nü nungi tenzüka Australia den Test asaya asem asayatsü lir.

Kasa mapang nung Chase ya England nung oa May 29 nü nungi white-ball asayamung asayatsü aliba nunga West Indies' squad nung densema lir.

West Indies' indang limited-overs captain Shai Hope-i Test captain atemabo pa masadangtsü mepeshia liasü.

Mitchell Starc IPL nung tanungba asayatem nung masayatsü

Monupii/May 17, 2025 (Agencies): Australia nunger bowler Mitchell Starc, Indian Premier League nung tanungba asayatem nung asayatsü atema meyipa marutsü.

Arishi küm 35 tain Starc, taküm Delhi Capitals nungi asaya 11 nung asayaago aser play-offs-i aitsü maongka lir, ajisüaka pa India-i meyipa marutsü, kechiyong Australia team taruba ita Lord's nung South Africa den World Test Championship final asayatsü lir.

Kasa mapang nung Josh Hazlewood-a Australia nung oa tapu yiruba anepaludar, aser pa Royal Challengers Bengaluru atema asayatsü atema meyipa arutsü marutsü tang tashi mejangjai lir.

RCB pur asaya asem asayatsü anunga lia tang tanabuba jenjang nung lir aser Delhi pur pongububa nung lir.

Australia nunger asayartem world Test title defend asütsü atema renemtsü asoshi UK nung June 4 nü ajuruteptsü.

IPL play-offs ya May 29 nü tenzüktsü aser final June 3 nü asayatsü, iba tetezü Hazlewood temang anema kümra pa IPL tatemlen shilem agitettsü.

Captain Pat Cummins aser batter Travis Head nata Australia Test squad nung densema lir, ajisüaka tenabo England-i mao tsünga Sunrisers Hyderabad nungi IPL



Mitchell Starc

season tembanga asayatsü atema meyipa arutsü. Sunrisers purbo play-offs-i aitsü kecha timla mali.

Cricket South Africa (CSA)-i, linük nungi Test asayartem IPL nung tanungba asayatem nung asayatsü masayatsü, iba indang kecha telangzüba agüja mali.

South Africa indang Test squad nungi Asayar ti IPL nung asayadar. Kagiso Rabada, Aiden Markram, Marco Jansen, Tristan Stubbs, Lungi Ngidi, Wiaan Mulder, Ryan Rickelton aser Corbin Bosch nunger ajak IPL nung asayadar.

South Africa pur June 3 nungi tenzüka Arundel nung Zimbabwe den warm-up asaya ka asayatsü lir.

Test Championship final ya Lord's nung June 11 nü tenzüktsü.

BILEMDANGANG

"Mapangi shinga matar."